

扬

州

丛

刻

扬

州

丛

刻

邗記卷一 江都 焦循里堂 著

揚州 陳恆和書林刻

春秋哀公九年秋吳城邗句溝通江淮杜預集解云

於邗江築城穿溝東北通射陽湖西北至末口入淮
通糧道也今廣陵邗江是杜預時中瀆故道未改所
述如是胡渭禹貢錐指本水經注作溝通江淮圖以
水經考之胡所圖未是也今詳析之水經注云中瀆
水首受江於廣陵郡之江都縣舊江水道也昔吳將
伐齊北霸中國自廣陵城東南築邗城城下築深溝
謂之韓江亦曰邗溟溝自江東北通射陽湖地理志

所謂渠水也西北至末口入淮此一段言吳之邗溝也注云自永和中江都水斷其水上承歐陽引江入埭六十里至廣陵城中瀆水自廣陵北出武廣湖東陸陽湖西二湖東西相直五里水出其間下注樊梁湖此一段謂永和中所改之邗溝道也注又云舊道東北出至博芝射陽二湖西北出夾邪乃至山陽矣此所云舊道卽永和前吳所溝通之故道漢志云江都縣渠水首受江北至射陽入湖蓋博芝與射陽南北相連中瀆水自廣陵東南直北入博芝射陽二湖不注樊良也注又云至永和中患湖道多風陳敏因

穿樊梁湖北口下注津湖逕渡渡十二里方達北口
直至夾邪此又申言永和中所改之道由樊梁湖注
津湖至夾邪不復由博芝射陽矣蓋博芝射陽湖在
東樊梁在西旣至樊梁不得又繞於博芝也湖之南
口沿東岸二十里穿渠入北口自後行者不復由湖
此興寧水道與永和又別者也胡渭作圖以邗水入
樊湖又由樊湖入博芝湖竟合吳之舊道與永和改
道爲一於酈氏之文未一觀之乎

謝靈運撰征賦云爰薄方輿乃屆歐陽入夫江都之
域次乎廣陵之鄉易千里之曼曼泝江流之湯湯此

由歐陽而江都由江都而廣陵陳太建五年北伐徐敬成爲都督乘金翅自歐陽引埭上泝江由廣陵自樊梁湖下淮此由廣陵而樊梁由樊梁而淮與水經注所敘永和水道合

春秋哀公十二年公會衛侯宋皇瑗于鄆杜預釋例云鄆發陽二名廣陵海陽縣東南有發繇亭晉之海陽卽漢之海陵與京口相對處也顧棟高春秋大事表云今通州如臯縣南十里有會盟原相傳爲吳楚會盟處考春秋之世吳楚始終無盟會事意必指此按是時江淮已通魯衛宋自淮而達吳自京口渡

江鄭亦江與邗相近之地耳如臯遠在海隅恐未必
徵會于彼

棠爲楚之邊邑今之六合也與邗爲接壤子胥在棠
半日可至邗上入吳之界內矣左傳稱伍尙令員奔
吳卽言員如吳言伐楚之利于州子則當時自棠奔
吳原無容假道于他國明白可見史記則謂員始奔
宋鄭又由鄭奔吳因有入昭關渡江云云旣由鄭奔
吳豈必復由楚地何人追于其後邪史記不足信也
特是自棠渡江爲今江寧其時亦楚地

三國志張紘
謂孫權曰秣

陵楚武王所
置名曰金陵

則員必沿江至今儀徵瓜洲間渡至京

口相傳胥浦橋爲伍員渡江處理或有之

胥浦橋今在儀徵

以劒與漁父或酬其濟渡之勞耳吳越春秋又傳會其說乃有掩子壺漿等語似渡江處仍爲楚地夫子胥智士不如是疏也

越滅吳不能正江淮北楚東侵廣地至泗土

史記楚世家

越伐楚楚威王興兵而伐之大敗越殺無疆取故吳

地

史記越王句踐世家

然則廣陵之地始屬吳繼屬越至此屬

楚楚懷王十年城廣陵

史記六國表

廣陵之名始見于此

威王滅越至是十五年

漢書地理志廣陵國四縣廣陵江都高郵平安臨淮

郡所屬有射陽鹽瀆東陽海陵興堂邑後漢則皆隸

于廣陵郡其泗水國之凌東海郡之海曲

卽海西

亦隸

之而海陵則省杜佑通典以東陽爲卽盱眙以射陽爲卽山陽然考之通典之說非也漢書地理志於臨淮之海陵注明有江海會祠則其地之瀕江瀕海可知也枚乘傳乘爲吳王濞郎中上書諫濞云轉粟西鄉陸行不絕水行滿河不如海陵之倉臣瓚云海陵縣名也有吳太倉後漢旣省海陵而東陽下卽注明有長洲澤吳王濞太倉在此則東陽海陵本屬相連旣併海陵於東陽而海陵之倉遂在東陽之地互核

前後兩志瞭然如繪也且惟瀕江之地有洲東陽有
長洲澤劉昭注補又言扶海洲上有草名薜則盱眙
何得有洲且有扶海之洲乎水經注謂廣陵城在楚
漢之間爲東陽郡高祖六年爲荊國十一年爲吳城
卽吳王濞所築是則以廣陵先爲東陽郡後罷郡但
存東陽縣耳盱眙爲義帝所都楚漢間自有其地前
漢爲都尉治所後漢分東陽屬廣陵而盱眙自屬下
邳何得合而爲一哉水經注又以中瀆水自廣陵出
山陽白馬湖逕山陽城西卽射陽縣之故城也漢高
祖六年封楚左令尹項纏爲侯國世祖建武十五年

封子荆爲山陽公治此通典以射陽卽山陽蓋本諸
此考章懷太子注臧洪列傳以射陽故城在安宜縣
東方輿紀要言安宜城在今寶應縣西南今寶應縣
東四十里有射陽鎮府志以此爲漢舊縣無疑以此
準之章懷所注正合且郡國志劉昭注補明言有梁
湖有博芝湖水經注言中瀆水自廣陵北出武廣湖
東陸陽湖西二湖東西相直五里水出其間下注樊
陽湖東北出博芝射陽二湖西北出夾邪乃至山陽
梁湖卽樊梁湖今在高郵城西北博芝湖在寶應城
東南九十里二湖屬之射陽則射陽縣地不獨爲今

之寶應而且緼入高郵矣水經言淮水東過淮陰縣北中瀆水出白馬湖東北注之然則今之淮安山陽乃漢之淮陰縣地而鹽瀆平安射陽則分得今鹽城阜寧山陽寶應縣地大約射陽在中瀆水之東平安在中瀆水之西北抵於淮南及梁湖安宜在今寶應縣之西南則在白馬湖之西蓋唐之安宜卽漢之平安其地西入今之天長而今之興化則漢之高郵海陵地今之靖江通州如臯則漢之東陽海陵地故以今之揚州準漢之廣陵郡不得謂平安卽今寶應亦不得謂射陽非今之寶應也不得謂東陽非今之泰

州亦不得謂海陵卽今之泰州也府志以射陽人臧
洪陳容載入是也而陳嬰起兵東陽與東陽甯君則
屏而去之非矣若海西故屬東海郡呂布襲劉備於
下邳備敗走海西其地雖屬廣陵實在淮北淩縣亦
淮北之地與今之揚州無涉府志載入徐淑徐璆淑
爲海西人璆卽其子載入誤甚

劉昭續漢志注補云東陽縣多麋博物記十千爲羣
掘食草根其處成泥名曰麋畷民人隨此畷種稻不
耕而穫其收百倍太平寰宇記載麋塹於海陵麋塹
卽麋畷亦以東陽卽海陵也

淮安之山陽縣始於東晉漢之山陽郡屬兗州在今金鄉魚臺之間東漢封荆爲山陽公蓋卽此兗州之山陽郡也酈氏以射陽故城當之東漢之初射陽之名未改何得以山陽公而治此城酈氏生於北南方水地往往淆誤此其一也

史記陳涉世家陵人秦嘉漢書注陳勝傳作凌人秦嘉地理志泗水國有凌縣水經注淮水篇言凌水出凌縣東流逕其縣故城東而東南流注于淮則凌縣自在淮水之北後漢雖屬廣陵郡而秦嘉實非淮以南之人臣瓚謂嘉爲廣陵人或以郡稱之然指稱陳

勝傳所云則當是誤陵人爲廣陵人耳水經注又言
廣陵在楚漢間爲東陽郡文穎以嘉爲東陽郡人蓋
亦以凌縣嘗隸廣陵郡在楚漢間凌或屬東陽也乃
東陽爲郡僅見水經注凌縣在楚漢時未必屬之且
史記稱銓人董緹符離人朱雞石取慮人鄭布徐人
丁疾之類皆以縣不以郡則東陽甯君自爲東陽縣
之甯君秦嘉以陳涉世家稱陵人故於此略之而陵
人正與銓人徐人等一類必不緣郡名而稱廣陵東
陽也乃高帝紀集解引陳涉世家亦云秦嘉廣陵人
而於陳涉世家陵人秦嘉則引地理志泗水國凌縣

漢書注引臣瓚說則作陵人秦嘉無廣字嘉固陵縣人不得與東陽廣陵混矣

項羽本紀言東陽少年殺其令相立陳嬰爲長東陽有令有長則縣名也廣陵人召平爲陳王徇廣陵陳嬰爲東陽令史東陽與廣陵儼然兩地蓋東陽郡自治廣陵廣陵爲附郡之縣東陽縣自在廣陵之東雖隸東陽而東陽郡實不治東陽也

漢廣陵國包於臨淮郡之中後漢并爲廣陵郡則自安平江都堂邑以東直至於海皆爲廣陵郡地晉武帝分立臨淮郡則以東陽高郵隸之三國志陳矯傳

云廣陵東陽人晉書陳騫傳云臨淮東陽人騫爲矯
子幼隨父仕魏魏拜使持節都督淮北諸軍事進爵
廣陵侯時廣陵在淮以南屬吳詳見後騫封廣陵僅持

節於淮北則已不復以廣陵爲家晉書稱臨淮東陽
者第因太康所分設而稱之耳後漢省海陵并入東
陽晉則廣陵郡有海陽注云有江海會祠與漢書海
陵注同知海陽卽海陵也晉省安平而有海陽荀羨
傳云東陽之石鼈隋書地理志言石鼈入於安平然
則晉以後漢之東陽爲海陽卽以後漢之安平爲東
陽其後立盱眙郡于是東陽又廢蓋其地并入盱眙